

sier Sabastian Zustignan, el cavalier, savio a terra ferma, et poi rispose sier Zorzi Emo, savio dil consejo; poi sier Zuam Arseni Foscarini, l'avogador. Hor fu preso la parte e sacramentà el consejo; la qual deliberation poi se intenderà.

A dì 12, la matina, fo letere di Padoa, di rectori e provedadori, di eri sera. I nimici, *ut supra*, dicevano voler andar a l'Olmo, altri diceva in val di Dresano, e sono pocho numero et mancho di quello ebene per avanti, *ut in litteris*; ma il nostro campo e le zente mal contente cridano danari e non voleno cavalechar. *Item*, havendo inteso che feraresi voleano passar a l'Anguilara, haveano mandato fuora alcuni stratioti con sier Ferigo Conarini, provedador l'horo, e domino Iannus di Campo Fregoso a quella volta, con li cavali lizieri, zercha numero 300. *Item*, scriveno altre particolarità, *ut in litteris*. *Item*, il signor Pandolfo Malatesta esser intrato con 400 cavali in Citadella, e sier Gregorio Pizamano, provedador, è venuto a Padoa.

Di sier Matio Samudo, pagador, vidi letere di eri, horre 24. Come a dì 10, a horre 3 di note, fo remor per la terra, *adeo* li proveditori montò a cavallo e tutti veneno a la piazza, e da ogni banda azonzeva fantarie, e tutti cridava: Marco, Marco, benissimo disposti. La causa di el remor fu, che fuora di la porta di Santa †, color era a la guardia fuora a la scolta, per non star in ocio, si haveva messo a robar zerti villani, dove i villani feze resistenza e fono a le man con dite scolte, e amazò uno di la scolta, et uno altro ferido, e per tal causa vene il remor. *Item*, i nimici stanno ancora a Barbaran, e lui tien, fazino menar el tutto dentro di Verona e depreparà el paexe, e poi se ne tornarà a Verona a invernarse senza far altro. Tutto el zorno si remete fanti; ozi ha pagato do compagnie de balestrieri, *videlicet* la matina, e tre compagnie di fantarie poi disnar. *Item* scrive, esser in fazende *etc.*

In questa matina, per colegio, a bosoli e balote, fu lassato uno prexon, era in li cabioni, chiamato, homo d'arme, per riscatar sier Lodovico Michiel, *quondam* sier Polo, fo preso castelan di Charavazo, combatendo, per forza, qual è

Item, si ave letere di Zanon da Colorgno, qual fo contestabele nostro, e se ritrova a Colorgno. Come, si la Signoria vol, verà a servirla, et par li sia stà per il colegio fato intender, el vengi *etc.*

Di Trevizo, dil provedador Gradenicho. Chome quelli villani dil paese, zercha numero X milia,

si sono reduti in uno, et voleno defendersi, et voriano capo *etc.*; *adeo* ozi, per colegio, fo mandato a Treviso X contestabeli, erano in questa terra, et datoli ducati X per uno, e siano capi di ditti villani. *Item*, esso provedador rimandò il podestà di Basan et di Axolo a le so podestarie, perchè ancora non à parso zente nimicha alcuna. *Item*, hessendoli stà mandato stratioti 150 di Padoa, li à mandati a Castel Francho per dar cuor a quel podestà, sier Piero da cha' Taiapiera, *etiam* perchè venendo zente nimicha, siano a quel passo *etc.*

Da poi disnar fo pregadi et leto le infrascripte letere:

Di Roma, di l' orator nostro, di 7. Come il papa andò, a dì 2, a Hostia con do cardinali, eboracense, de Ingaltera, et San Clemente, Arzentin, e dovea tornar a dì 7, e poi faria una cavalechata a Viterbo e quelli contorni. *Item*, come era stà publichà e impresa la bolla dil concilio chiamato per il papa, et ne manda una a la Signoria, la qual fo leta im pregadi. *Item*, siegueno contra li 3 cardinali scismatici, et hanno fato li brevi di suspender le intrade, li qual cardinali, si dice, sono iti a Pisa. *Item*, il papa manda la galeaza sua in Ingaltera per stagni, per coverzer la chixia di San Piero, et manda uno presente a quel re, di 100 peze di formaza parmesano e bote di vin *etc.* *Item*, aspeta letere di Spagna et Ingaltera, in materia di la liga. *Item*, scrisse altre particolarità, e il papa vol far zente *etc.*; e *omnino* aver Bologna. E nota. Il papa à dato l'abazia de Vidor al cardinal Corner, che fu primo ave la nova, è andò a Hostia a trovar il papa, et la dimandò e l'ave, atento il vescoa' di Verona e la Badia di San Zen di Verona non ha le intrade za uno anno, e l'imperador ge l'ha tolte *etc.*

Di Napoli, di Lunardo Anselmi, consolo, di 185
2. Come li erano fanti 6000 venuti, poi ne zonseno altri 3000, et si ha aviso di la corte, dil partir di Spagna l'armata dil re, e il numero scripto per avanti, et vien a Napoli, su la qual è fanti 3000, homeni d'arme 500 et zaneteri 700. *Item*, si aspeta altri 3000 fanti de Cicilia, et è li, in Napoli, homeni d'arme 700, si che il re di Spagna arà in Italia fanti 15 milia e homeni d'arme 1200, et cavali, zaneteri *etc.* E se divulga, ditte zente à hordine di esser a ubedientia dil papa. *Item*, il ducha di Termeni è varito, ma non si move ancora per venir a' servigij dil papa, et altre particolarità.

Dil conte Ivanis, date im Poliza, a dì 25 luio. Chome è zonto il suo cancelier, e inteso il zonzer di ducati 1500 per far li cavali numero 200,